

Мұхтар Мағауин

АБАЙДЫҢ БЕЛГІСІЗ ӘҢГІМЕСІ

Қазақтың қасиетін тану – Абайды танудан басталмақ. Халқымыздың сөз өнерін зерделеу – Абай тағылымын бағамдаудан байқалмақ. Абай – қазақ тарихындағы қайталаңбас сом тұлға. Абай биігі – халқымыздың көркемдік ой-танымында ешкім жетпеген занғар. Университет қабырғасында дәрісін тыңдалап жүрген кезімізде ұлы жазушы Мұхтар Әуезовтің өзінің: “Мениң тілімде Абай тілінің мәдениеті бар“, – деп балаша мақтанғаны көкейде қалыпты. Ол кезде “Абайтану“ дейтін арнайы курс бар еді, “Абайтану“ аталатын өрісті ғылым бар еді. Мұхан дүниеден көшкелі отыз жылға ойысты. Мәдениеттің, өнердің, ғылымның барлық саласында бірдей өскенімізге күмән жоқ. Бірақ ұлы шәкірт – ұлы ұстаз негізденген ғылымының “тануы“ кетіп, Абайға ғана қалыпты. Арамыздан “соның өзі қалай...“ дейтіндер де табылатын сияқты. Бұл, сыпайылап айтсақ, баяғы “итке темір не керектің“ кері. “Тенізден таудай толқын соқса-дағы – Жағадағы жартасты жыға алмайды“, – деп еді хакім Абай. Уақыт дауылы, замана толқыны, сілкініс пен дүрлігіс, төңкеріс пен апат – ғаламдағы ешбір хикмет тұғырынан қозғай алмайтын алыштар болады десек, қазақ мәдениетінің тарихындағы мызғымас тұлғалар – Абай мен Ахмет. Ахаңның өзгеше қызметін, біздің халықтың өткен тағдыр-талайындағы ғана емес, бүгінгі жеткен болмыс-бітісіндегі биік тұрғысын әлі бағамдал болғамыз жоқ, бұл – алпыс жылғы темір қапастан соң түсінікті де жағдай. Ал Абай... Абайды да танып-білуіміз кеміс жатыр. Көлденең себептерден, ықылас-ниеттің аздығынан емес, өреміз жетпегеннен. Бұл – ең алдымен елдің зиялыштары санатындағы, тіпті қалам ұсташа қасиетінде ағайындарға – бәрімізге қатысты сөз. Абай толық танылған жоқ. Әдебиетші қауым үшін сын емес, мін. Соның бір көрінісі – Абай прозасы төңірегіндегі ұғым-талғамымыз. Абайдың ұлы реформатор ақын ғана емес, қазақ прозасын негіздеушілердің бірі екендігі, тіпті әдебиет окулықтарының өзінде ескеріле бермейді. Осы орайда, қазақ прозасының туып, қалыптасу тарихындағы көп күнгірттің бетін ашатын, әрі ұлы классигіміздің қымбат мұрасын молықтыра түсетін соны дерекке назар аударған едік: Шәкерім алғаш ақталған кезде жазылған бір мақаламызда (“Жұлдыз”, № 8, 1988), одан соң Шәкерімнің “Жолсыз жаза“ атты жинағына (“Жалын” баспасы, 1988) берілген алғы сөзде Абайдың өзінің көзі тірісінде баспасөзде жарияланған, осы уақытқа дейін елеусіз қалып келген бір әңгімесін атап көрсөттік. Көп ұзамай, аталмыш әңгіменің тексті де жарыққа шықты (“Жұлдыз”, N1, 1989). Халқымыз үшін қуаныш болар, бәлкім, әдебиетші қауымның әр түрлі пікірін туғызар деп ойлаған едік. Тысыр еткен дыбыс жоқ. Тым-тырыс. Жаңғырық... жаңғырық шықты. Әңгіме сол бүрінғы қалпында, яғни, кімдікі екені белгісіз күйінде “Дала уәлаятының газеті“ атты үлкен топтама

құрамында қайыра басылыпты. Мұндай кітаптың дайындалуы – ете күрделі іс, ал халық алдына жетуі – игілікті оқиға. Жинақтың мәні, құны жөніндегі әңгіме бір басқа. Біз бұл арада Абайдың аталмыш әңгімесінің сол иесіз қалпында берілуіне ғана таңырқап отырмыз. Біздің Ғылым академиясындағы ағайындардың сөз ыңғайына (дәлірек айтсақ, мұлде үнсіз отыруына) қарағанда, бұл әңгіме ұлы ақынның кезекті кітабы басылғанда да қаперге ілінбей қалатын тәрізді. Сондықтан, “Дала уәлаятының газетінде“ бұдан жұз жыл бұрын (1892, N29, 31-32, 34-40) жарияланған “Қазактардың естерінен кетпей жүрген бір сөз“ атты хикаяның авторы кім деген мәселеге арнайы тоқталуға тұра келіп отыр.

Алдымен ескерте кетейік, аталмыш хикая әдебиет тарихында мұлде белгісіз дүние емес. Бұл шығарманың авторы туралы да сөз айтылған. Бірақ Абай есімі аталмады. Шәкерім туындысы деп шамаланады. Басты дәлел – хикаяның бақытсыз ғашықтар Еңлік – Кебек пен Қалқаман – Мамыр тағдырына арналуы. Шәкерімнің аты жалада жүрген кездің өзінде оның дәл осы тақырыпқа жазылған, халық арасына кеңінен тараған поэмалары барын ешкім теріске шығара алмайтын еді... Бұған қосымша дәлел – әңгіме авторының лақап аты. Байыптаң қарағанда, бұл екі жағдай да шығарманы кім жазғанын нақтылауға негіз бола алмайтынына көз жетеді. Аңыздық немесе деректі бір сюжеттің әлденеше қаламгер назарына ілінуі – әдебиет тарихында жиі кездесетін құбылыс. Оның үстіне, Абайдың өз шәкірттеріне кейбір тақырыптар төнірегінде арнайы тапсырма беріп отырғаны, ал Еңлік – Кебек оқиғасын жазуды Шәкерімге міндеттегені белгілі. Екіншіден, “Дала уәлаятының газетіндегі“ әңгімеге қол қойған – “Ұмтылған“, яғни -“талаптанушы“, “ізденуші“ болса, Шәкерім де өз өмірінің соңғы кезеңіндегі біраз шығармасына “Ұмытылған“, яғни “естен шыққан“, “ескерусіз қалған“ (дәлірек айтсақ, “Мұтылған“) деп қол қояды. Араб жазуының кілтипаны көп, әңгіме авторы – “Ұмытылған“ болған күннің өзінде, бұл – 1892 жылы отыз төрт жасқа жаңа шыққан Шәкерімнен гөрі, сөз өнерінің асқар биігіне жеткен, алайда “қалың елі – қазақына“ елі таныла алмай, тар қапаста күніреніп отырған Абайға көбірек үйлеседі. Әйткенмен, әзірше екеуін тең ұстайық. Мүмкін, әңгіме авторы Шәкерім де, Абай да емес, мұлде басқа біреу шығар? Жоқ. Устірт қарағанның өзінде хикая авторы – Шынғыстау казагы екеніне күмән қалмайды.

Негізінен баяндау үлгісімен жазылған көлемді хикаяны шартты түрде үш бөлімге жіктеуге болады: бірінші – Шынғыстау өнірінің тарихи-этнографиялық сырттамасы, екінші – Еңлік – Кебек оқиғасы, үшінші – Қалқаман – Мамыр оқиғасы; хикая автордың өз заманына көзқарасынан елес беретін және болашақта жазбақ, осыған жалғас енбегінің мазмұнына нұсқаған сөздермен қорытындыланады.

Әңгіменің әлхамында “қазактың кәрі шалдарының“ откен және осы заманға көзқарасы байыпталады. “Солардың айтуларынша, қазактың жүріп-тұру шаруасы бұрынғы заманда осы күнгіден артық екен. Мәзікур бишара шалдар өздерінің балаларына, ұрпақтарына қасіреттеніп айтЫП отырады: “Осы күнде білімді, ғылымды халықтармен араласқан соң, қазак

халқы бұзылды және күн де бір түрлі болды – қыс қатты болатын болды, бұрынғы заманда мұндай емес еді“, – деп“. Бұдан ары жазушы осы негіздеңі түйінді мәселелерді нақты талдай отырып, заман және экология, география мен тарих төнірегінде кенес қозгайды. Бұл ретте біз автордың үлкен ойшыл ғана емес, жай ғана ғұлама емес, европалық білімді еркін игерген оқымысты екенін көреміз.

“Адамның бір ғадеті – бұрынғы өткен уақытты онша мақтағандай болмаса да мақтау“, – дейді автор. Сөйтеп тұра қариялардың сөзін түгелімен теріске шығармайды. Ендеше ауа райы неге бұзылды? “Бұрынғы заманда тауларда орман көп болып, орманда қар көп болып, қардың себебінен су көп болып, ала жаздай тау-таудан өзен-сулар тартылмайды екен“... Ал орман-тоғайдың қырқылуы, от пен судың азаюы, жердің тозуы – адамның табиғатқа кері әсерінің нәтижесі. Және бұл – тоқтаған, тұйықталған процесс емес. Әлі жүріп жатыр. Яғни хикая авторы біз енді ғана сөз етіп, қолға алып отырған экология мәселесі туралы өткен ғасырдың өзінде-ақ дабыл көтеріпті. Бұл, әрине, көзбен көріп, көңілге тую негізінде ғана жасалған қорытынды емес, батыс ғылымымен жақсы таныстық нәтижесі.

Экологияға жалғас екінші мәселе – географиялық ортаға қатысты. Бұрынғы заманда қазақтардың атамекен қонысы сулы, нұлы, шұрайлы болған, шаруашылыққа қолайлы екен. Енді жер азған, “қырда бұрынғыдай орманды, жақсы жерлер жоқ“. “Бұрынғы өзен-бұлактар тартылған соң, бірдеме қылыш құдық қазған болысады, көбінесе сулары аңы болады“. Ал қазақтар үздіксіз соғыстарда дұшпаннан аруағы асып, қорғап қалған кең байтақ дала сол ескі күндерде қайнаған өмір ордасы болған. Оған дәлел – “бұрыннан қалған сымтастар, қорғандар“...

Бұдан соң автор, сөз ыңғайына қарағанда, ел аузынан естіген, сонымен катар, батыс пен шығыс тарихынан оқып білген деректеріне жүгінеді. Ол – Шыңғыс ханның қазақ жеріне келу жайы, хан көтерілуі. Шыңғыстау өнірінің тарихы, мұндағы көптеген топонимдер атақты ханға, оның қолбасы батырларының есімдеріне тікелей қатысты екені айғақталады.

Осы өлкениң, осы мекендердің Шыңғыс хан дәүірінен соңғы, бірақ өз заманынан көп бұрынғы ахуалы, мінез-құлық, дәстүр-салты туралы әңгімеге ауыса келе, автор хикаяның негізгі бөлігіне көшеді. Ол – ел есінен кетпей жүрген Еңлік – Кебек әңгімесі. Автор бақытсыз ғашықтар туралы халық жадында сақталған көне хикаяны ешбір оқиғасын өзгертуей, қаз калпында баяндаған сияқты. Бірақ бұл – қарадүрсін жазба емес, аса көркем жасалған, озық мәдениетті проза үлгісі. Әңгімегегі трагедиялық ситуация, шиеленіскен драма, терең психологизм – тәжірибелі де шебер, әрі шығыстың дәстүрлі прозасы мен батыстың жана әдебиетін еркін игерген білімдарға ғана тән қалам таңбасын танытады. Осыған орай, сенімді қолмен сыйылған рең-бояу, бедерлі суреттер мен өзгеше иірімдер – толыққанды реализм нәтижесі. Әңгіменің өз заманынан озық, тіпті, қазіргіге де үлгі болар бір сырпаты осында.

Біз шартты түрде хикаяның үшінші бөлімі деп отырған Қалқаман – Мамыр оқиғасы өте қысқа, шағын ақпар түрінде беріледі. Автор бұл

әңгімені өткен заманың рәсім-салтын, мінез-құлқын нақты танытатын деректі, иллюстрациялық материал ретінде пайдаланған.

Енді осы бөліктің фабулалық ерекшеліктерін қарастыралық.

Қалқаман – Мамыр оқиғасы көпке белгілі поэмадан мүлде өзгеше сипатта. Біріншіден, бұл оқиға Кенгіrbай заманында, әрі Еңлік – Кебек трагедиясынан көп кейін болады. Қалқаман – Кенгіrbайдың өзінің ағайыны; Мамырдың аты аталмайды, Қалқаман әйтеуір бір қызды алғып қашады. Бар шатақ жесір дауынан туындастырылған сияқты. Кенгіrbай екі ел арасындағы барымтаны тоқтату үшін “Қалқаманды атқа мінгізіп қойып, дұшпандарынан бір мерген“ шығарып атуға бұйырады. Оқ тимей, аман қалған Қалқаман ағайындарына өкпелеп, Бұхараға кетіп қалады. Қыз тағдыры туралы ешқандай дерек жоқ. Автор Қалқаман жөніндегі ел әңгімесін шала білді, немесе саналы түрде бұрмалады деп айтуда қиын. Аныздың кейбір нұсқаларында Қалқаман – Мамыр оқиғасы Еңлік – Кебек оқиғасынан сәл ғана бұрын, бірақ Сыр бойында емес, Баян-Аула төнірегінде болады. Яғни біз сөз етіп отырған әңгімеде Қалқаман оқиғасы толық болмаса да (қыз бен жігіттің ағайындастырылған туралы деректі автордың бүгіп қалуы занды) әуелгі, шындық қалпына жақын үлгіде мазмұндалатын сияқты. Сонымен қатар, бұл – кездейсоқ, бөгде эпизод емес. Дербес жүк арқаламағанымен, алдыңғы трагедияны бедерлей түсу, оған үстеме рең беру үшін енгізілген көрініс.

Еңлік – Кебек оқиғасы да негізгі тұрғыларында ел әңгімесінің нақпа-нақ таңбаланған көрінісі деп білуге тиіспіз. Өмірлік, әдеби-фольклорлық діні ортақ болған себепті, фабулалық өзегі кейінгі поэмамен нақпа-нақ келіп жатуы занды. Бірақ бұл – екі туынды бір адамның қолынан шықты деген қорытындыға негіз бермесе керек. (Мұхтар Әуезовтің әйгілі трагедиясы да қалыптасқан сораптан ауытқымайды ғой). Сондай-ақ, біз талдан отырған хикаядың Қалқаман, Еңлік – Кебек оқиғаларының әйгілі поэмалар желісінен айырым белгілері де бұлардың авторы бөлек деп айтуда дәлел бола алмайды. Өйткені өмірлік материал әр қылыш екшеуден өтеді, тіпті нақты бір автордың нақты бір шығармасының өзінде әуелгі және соңғы нұсқалардың арасында түбекейлі айырмашылықтар ұшырасуы мүмкін. Сондықтан біз бұл мәселені автордың даралық тұлғасы, дуниетанымы, қаламгерлік тұрпаты, білім-таным дәрежесі, жазу машины тұрғысынан қарастыруымыз керек.

Хикая авторының өз заманынан озған білімдарлығы туралы айттық. 1892 жыл қарсаңында тек Шыңғыстау өнірі ғана емес, бүкіл қазақ даласында мұндай өреге жеткен жалғыз Абай болатын. Шәкерімнің әлі жас, талантты толысса да, білімі толықпаған, батысты тануға енді ғана бет қойған, негізінен шығыс әдебиетіне үңіліп жүрген кезі. Тарих, социология, экология, этнография – адам қоғамының даму зандылығы туралы толғамдар бұл кезеңде Абай бойына ғана шактасар сипат.

Халық кешкен жол, көне ғасырлар келбеті туралы айтсақ, хикая авторы өткен күнді дәріптемегенімен, оны ел тарихындағы бұла дәуір, өзгеше кезең деп біледі, қатал зандарын айыптай тұра, бағзы заман бойынан, халық тұрмысы, оның салт-дәстүрлерінен көптеген қасиет табады.

“...Шалдардың сөздерінің жарымына наңған мезгілде де, бұрынғы уақытта... халық ғаділетті, қулық-сұмдық жоқ екен. Халықтың рәсім-ғадеттері бұзылмай орнына келіп тұрады екен, халықтың мінезі ақпейіл, мейлінше табиғатты екен...“ Бұл – қарттардың әңгімесін қайыра байыптауғана емес, белгілі мөлшерде жазушының төл пікірі.

Хикая авторының өз көзқарасын тікелей айтатын, өткенді бүгінгімен шендерстіре отыра, халық қасиетін ашуға ұмтылатын тұстары да бар. “Бұрынғы уақытта халықта батырлардың құрметті екені белгілі. Себебі, бұрын батырлар әрдайым халықты қайрат қылады екен һәм жай уақытта халық арасында ғаділетті, хұқімші де екен. Батырлар халықтың пайдасын тастап, өз пайдасы үшін қимылдамайды екен.“ “Нысан... қобызымен ойнағанда... тындағандардың көздеріне жас келіп отырады екен. Бұл күнде олардай қобызшы жоқ. Бұрынғы қобызшылар қайда, есіткен кісілерді ерітіп жіберуші еді. Қазақтардың бақсылары бұрынғыдан қалған бір мұрасы, сонда да бұрынғыдай емес“.

Батырға, бақсыға, заман адамына көзқарас осындай болғанда, сол кездегі ел ұстаған билер басқаша сыппатта бейнеленеді. Мәселен Кенгіrbай – “халық оған ауып кетеді“ деп, яғни тұптің-тубінде билікті алмаса да, хұқіміне тежеу салар деген қауіппен Кебектен құтылуға тырысады. (Кейінгі интерпретацияда Кенгіrbайдың пара алуы – замана кейіп, образ табиғатымен үйлеспейтін жалған шешім.) Қолға түскен Кебек пен Енлікті өзі тергейді, өлімге өз қолынан береді, олардың бесіктегі жас баласын далала тастап кетеді. Хикая авторы Кенгіrbай Қалқаманға да шарасыздықтан емес, саналы түрде қatal билік қылды деп біледі. Сонымен қатар, Кенгіrbай жалғыз болмағаны, басқа билердің де оны қолдағаны байқалады. Билер тек ұнамсыз кейіптеғана көрініп қоймайды, авторлық көзқарас тұрғысынан тұпа-тура айыпталады: “Осындай үш кісіні бір жерде өлтірсе де билер түзеле қойманты, бірақ өздерін халық сүймейтінін біліпті. Оларды негып сүйсін, адамға еркіменен ешнәрсе істепеген соң, аяғын олай-бұлай бастырмаған соң.“

Ата қазақ: “Елге бай құт емес, би құт“, – деп еді. Ескі заманда ататегіне емес, асыл жетесіне қарай, мал байлығы үшін емес, парасат байлығы үшін халықтың өзі сайлап отырған билер – ру ұйтқысы, мемлекет тірегі қызметін атқарады. Тарихта оған қаншама мысал бар: Сүтемген, Әнет, Төле, Тайкелтір, Қазыбек, Әйтеке... Қазақ дербестікten айрылғаннан соңғы дәуірдегі, патша өкіметінің нұсқауымен бекітілген билердің жөні бөлек (қызметі тұрғысынан алғанда бұлар хұқімші би емес, дау-дамай тарқатар қазы, біздің бүгінгі тілімізben айтқанда сот қана). Әлде сол жалпош, жебір билердің әсері ме, әлде өткен замандағы белгілі бір адам – Кенгіrbайға байланысты жұрт арасындағы әңгіме салқыны ма, – көне дәуірден бірталай үлгілі сыпат тапқан хикая авторының айтуынша сол кездегі келенсіз жайыттардың барлығы да билердің кінәсінен болып шығады.

Ал поэмалар авторы Шәкерім қазақтың ескі куні туралы тым биіктен сөйлейтін, ежелгі салт-дәстүрлердің көбін “надандыққа“, “тағылыққа“ телитін. Бірақ ақынның билерге көзқарасы басқаша. Кенгіrbай тек ел

мұддесін ойлайды, “кара қазан, сары баланың қамы” үшін, “малға тойын, жайлы қоныс“ үшін күреседі, қанша қайысса да, трагедияға тосқауыл бола алмайды. Арыдағы Әнет Бабаң, Кенгірбай-Қабекенен бастап, берідегі Құнанбайға дейінгі шонжарлар жөнінде тегіс ұнамды пікір айтып өткен Шәкерім атақты би, аруақты ағайын тұрасында қатаң сөзге баруы мүмкін емес.

Хикаяның көркемдеу жүйесіне келсек, бұл ретте де Шәкерімге жат сыпаттар молынан кездеседі. Жоғарыда ескерткеніміздей, образ табиғаты, кейіпкерлердің іс-әрекетіне байланысты қайшылықтарды сөз етпей-ак қояйық. Кез келген қаламгердің өзінің әуелгі шығармасын қайта қарауы, өзгертуі, жетілдіруі мүмкін дедік. Әйткенмен, кейбір детальдарға назар аудармай болмас. Соның бірі – портрет болса, бірі – жанды пейзаж.

Хикаядығы Еңлік портретіне зер салайық. Еңлікті Нысан Абыздың елес арқылы көріп суреттеуі: “Ұзын бойлы, ақ киіктей, шашы қарғаның қанатындағы қара, маңдайы жазық, көзі қара һәм өткір...“ Кебектің көзбен көріп түйсінуі: “...қалыпсыз сұлу қыз ұшыраса кетеді, бұрын көрген рәуішлі болып. Әбден есі кеткеннен амандасуға мұршасы келменті. Атының жалына қонып, бұрынғы бақсының айтқандары көніліне тегіс келді дейді. Сол қыздың барша сыпаттары айтқандай болып көрінді дейді“. Ал поэмадығы Еңлік “биік қабак, сұрлау қыз“ ғана. Кебекті сұлулығымен емес, мінездімен, қылышымен баурағандай. Бұл арада тек поэмалары ғана емес, басқа шығармаларында да Шәкерімнің дәйекті портретке көніл бөле қоймайтынын, ал Абай алғашқы өлеңдерінен бастап-ак жанды портрет жасауға мән бергенін ескерте кеткен артық болмас. Әуелгі дәйекті портреттің мүлде мансұқ етіліп, жалғыз-ак штрихпен алмасуы, екі Еңліктің өзара ұқсамауы кездейсок емес. Жалпы, хикаядығы сәтті сурет, ұтымды көріністердің поэмада мүлде назардан қақас қалуы – әдепкі жағдай. Мәселен, Нысан Абыз – “түсі суық, карт кісі“. Поэмада абыздың нақты жас мөлшері, түр-түсі туралы сөз жоқ. Тек бал ашқан сәті ғана бейнеленеді. Бал ашу эпизоды хикаяда да бар. Екі көрініс те өте әсерлі, шебер жазылған. Ортақ сыпат – бақсының болашақты болжауы, жас батырды қатерден сақтандыру десек те, бұл екі сурет бірін-бірі қайталамайды. Хикаядығы бедерлі деталь, мінездік айшықтардың ешқайсысы да поэмада енбей қалған. Керісінше, поэмада хикаядығы көркемдеу тәсілдерінен аулақтауға тырысуышылық байқалады.

Хикаяда Кебектің Нысан Абыз балынан соңғы көніл толғанысы батыс прозасына тән үлгіде, табиғат суретімен астас берілген: “Айтқандарынан ешбір қорықпай, жай үйіне қайтыпты. Сол уақытта әр түрлі ой түсіп, көнілі босап, ақырын ілбіп отырды дейді. Сонда Кебектің көніліндегі қасірет кетіп, көкірегі ашылғандай болды дейді. Маңайына қараса, биік жартас, қалың орман-ағаш һәм сарқырап ағып жатқан бұлақ дейді. Сонда Кебек батыр ойлады дейді: “Менің ғұмырым да осы дүниемен бірдей-ау, – деп. – Мына жартас болса, бір қалыппен тұратын дүние; самсып түрған орман өткен ғұмырға ұқсас, ағып жатқан су өтіп бара жатқан өмір ғой“, – деп. Жастықта адам ой ойлаушы болады ғой“. Ал қыздың өзімен кездескен кезінде абыз сөзі есіне түссе де, өлім туралы мүлде ойламайды.

Поэмада Кебек қатал тағдыр туралы болжам шымбайына батқанмен, “жынның сөзін” қолма-қол ұмытып кетеді; Еңлікпен алғаш кездескен сәтінде де ойына ештеңе оралмайды. Тек ертеңіне, қызбен тағдыры қосақталған соң, абыз айтқан қара жартасты көргенде ғана бәрі есіне түседі; қатты толқығанмен, тез бекінеді. Бұл арада қара жартас – шартты белгі ғана; құз кейпі немесе өзен, тоғай реңі – ешқандай жанды бояу жок. Бұл занды да. Шәкерім – табигат суретіне зер салмаган қаламгер, “Жолсыз жазада” ғана емес, бүкіл Шәкерім творчествосында пейзаждың кейбір элементтері ғана ұшырасады. Бұл – бүкіл классикалық шығыс поэзиясына тән сырт. Ал батыс пен шығысты тел емген, бейнелеу тәсілдерінде орыс және Еуропа классикасын ұлгі тұтқан Абай қазак әдебиетіне (бүкіл шығыс поэзиясына) пейзаждық лириканы енгізген бірінші суреткөр болып табылады.

Өрнектеу, бедерлеу, дәйектеу (детализация) жағы да осы сыртта. Поэмада Кебектің аңға шығуы жалпылама ақпар арқылы беріледі, ал бүркіттің тұлкіге қалай түскені мүлде айтылмайды. Ал хикаяда бұл көрініс батыс прозасының дәстүрінде тәптіштеп суреттелген.

Әлбетте, тақырыптас екі туындының бірі – проза, бірі – поэзия ұлгісінде. Сөзбе-сөз, нақпа-нақ келуі мүмкін емес. Бірақ өз жазғанынан өзі қашқан, әуелгі әдемі суреттерді біржола мансұқ етіп, жаңа өрнек іздеген кім бар екен?!

Енді Шәкерім прозасының ұлгілерін қарастыралық. Ірікеп ілмес үшін кез келген шығармасының басқы сөйлемдерін-ақ алайық.

“Әділ – Мәрия“:

“Кәрі Шыңғыстау! Адам жерге ие болғаннан бері қарай сенің көрмегенің жоқ. Шыңғыс, Темір сияқты талай-талай сыйыпқырандарды да қолыңдан жөнелттің. Сенде талай адамның құмары қаныш, қуанғаны да болады, жүрегі жаныш, суалғаны да болды. Талай-талай талпынған жас жүрек мұратына да жетті“...

“Ұждан“:

“Қытай патшалығы – ең ескі патшалық. Отырықты өмірге ерте түскен қауым. Ескі заманда қытайлар рақатты өмірде болған...“

“Үш сауал“:

“Бір патша: “Үш түрлі нәрсені құні бұрын білген адам бақытты болар еді, – деп, соны тауып берген кісіге көп сый беремін“, – деп жариялапты...“

“Бәйшешек бақасы“ топтамындағы әңгімелердің бастамалары:

“Атақты Атымтай жомарт алғашқы кезде бір жұмада өңкей білгіш шешендерді қонақ қылыш, келер жұмада жастарды қонақ қылыш, ендігі жұмада қаріп-қасерлерді қонақ қылады екен...“

“Откен заманда Мекке, Мәдинеге Құжаж деген адам патша болған. Елге мейірімсіз, қатты жүректігінен “Құжаж залым“ атанған...“

“Арабтың бір патшасына бір уәзірі Ләйлі мен Мәжнүннің жайын әңгіме қылышты...“

“Бір байдың қызына шешек шығып, бетін тыртық қылғандықтан ешкім алмай, аяғында екі көзіне ақ түскен бір соқырға беріпті...“

“Бір адам қайыр сұрап, көп ақша жиып, әбден байыса да, қайыр жиған әдетін қоймапты...“

Бойлай оқысақ, өзіндік сыйпаты бар өрелі қолтаңба көреміз, Абай әсері, шығыс әсері байқалады. Бірақ өткен үлгіден гөрі бүтінгі қалыпқа бейім. Бастауыш пен баяндауыш өз орнында, анықтауыш, толықтауыш, пысықтауыштар тиесілі жерінде. Қазіргі қалыптасқан проза машиғына жат, бірден көзге ұрар айырым белгілер байқалмайды.

Енді хикаяны қайыра оқылық. Сөйлем құрылымдарының қалыпты жоба, үйреншік үлгіден мүлде бөтендігі бірден танылады. Одағай бітім, тосын тіркес, ерекше жүйе. Үстірт көзге (турасын айтсақ, дүмше білгіштерге) сауатсыз болмаған қүннің өзінде, тым анайы, кедір-бұдыр, кібіртік көрінуі де мүмкін. Бірақ мұның бәрі машықты қолтаңба, ежелгі дәстүр жемісі, тек біз ұмытқан, мүлде дерлік қолданудан шыққан өзгеше стилистика. Жоғарыда біз ой ретіне, сөз орайына байланысты келтірген (яғни стильдік тұрғыдан іріктелмеген) мысалдарға зер салыңыз. Хикаяның кез келген тұсына ежелей үнілініз. Өз толқыны, өз қисыны бар, табиғи да байыпты, әсем құрылымдар.

Хикаяның басынан түсейік.

“Осы мысал бұрынғы уақыттан қалған. Қазақтың кәрі шалдары бұрынғы өткен уақыттарын айтып отырады, өздерінің ата-бабаларынан қалған сөздерін...“

Хикая дәл осы қалпында қазіргі баспасөздің тегершігін ұстап отырған редактор – тәжірибелі журналистің, тәп-тәуір жазушының алдынан өтті дейік. “Түзеліп“, “өндөлген“ соң мына қалыпқа түспек: “Бұл – бұрынғы уақыттан қалған мысал. Қазақтың кәрі шалдары бұрынғы өткен уақыттарын, өздерінің ата-бабаларынан қалған сөздерін айтып отырады...“ Бәрі дұрыс. Бірақ бұла сөйлемдер өзінің қан-сөлінен айрылып, жансыз кепке тұсті.

Ары қарай сүзіп оқыңыз, аттамалап түсініз, әр жеріне көз салыңыз. Өзгеше күрмеу, қызғылықты конструкция.

“Енді бұрынғыны айтып отырған қарттар байқай ма еken, бұрын қүннің жылы болатыны – сол замандағы орман-ағаштың көптігінен екенін. Осы күнде сондағы ағаш тауларда аз, қырып бітіріспіті“.

“Осы күнде қырда бұрынғыдай орманды, жақсы жерлер жоқ, тым болмаса жолаушы сапар шегіп талғанда тұра қалып көңіл көтергендей. Сондай жақсы еш нәрсе қалмаса да білініп тұр, бұрынғы қалған сымтастарға, қорғандарға қарағанда баяғыда бұз далаларда тұру жаман болмағаны. Бұларды байқамаған адамдар біле қоя ма һәм көңілдеріне ала ма!“

“Сонда Кебек көңілін көтеруге бүркіт алып шықты дейді. Далада аулап жүрсе де һеш түлкі жолықпады дейді. Сөйтіп отырып матай тайпасы мекен ететін Хан тауына шейін барды дейді.“

“Сонда Кебектің мойнына арқан тағып, аттың қүйрығына байлап өлтірді дейді. ...Сонан соң бұл бейшараны да еріндей қылып өлтіріп, сүйектерін қазулы тұрган бір орга тастай беріп, сөйлесіп қойғандай тұс-

тұсына жөнелді дейді. Жас балаға ешкім қарамай тастап кетті дейді, бесігімен. О да сол жерде жылап өлсе керек“.

Қазіргі проза түгілі, XX ғасырдың бас кезіндегі қара сөз ұлгілеріне мүлде үйлеспейтін құрылым. Біршама машиқты прозашы Шәкерімнің көркем туындыларында, тарихи, философиялық еңбектерінің ешқайсысында бұл тұрпаттас стилистика атымен ұшыраспайды.

Орта ғасырларда, “Қиссас-ұл-әнбия“ мен “Бабур-нама“ кезінде қалыптасқан, кейінгі ұрпақтары мүлде ұмытқан ежелгі түрік прозасын зерделей оқып, бойына сінірген Абай, ұлттық фольклордағы, халық тіліндегі көркем машиқ, қалыпты ұлгілерді пайдалана отырып, жана қазақ әдебиетіне өзгеше жазу мәнерін әкелген еді. Қайталап айтайық, Абай стилистикасы – көне түрік өрнегін ұлгі тұта отыра, халық әдебиетінің, ділмар шешендердің, әңгімелі, ертегішілердің сөйлеу машиғынан табиғи нәр алған өзгеше құрылым. Кейін Мұхтар Әуезов дамытқан, қазіргі кейбір жазушылар қолданып та жүрген, ой ағымына, сөз әуеніне орай түзілетін, кітаби жасандылықтан ада, осы тақылеттес сөйлем жүйесі Абай “Фақылияларының“ кез келген бетінен ұшырасады.

“Бұрынғы қазақ жайын жақсы білген адамдар айтыпты: “Би екеу болса, дау төртеу болады“, – деп“. (“Үшінші сөз“).

“Өтірік, көрмегенін көрдім деуші куәлер да әлдекашан дайындалып қойылған, бағанағы жақсы адам сайлауға жарамасы үшін“. (Сонда).

“Әрбір байқаған адам білсе керек: күлкі өзі бір маstryқ екенін, әрбір мас кісіден ғафил көп өтетүғынын да, әрбір маstryң сөйлеген кезінде бас ауыртатүғынын“. (Төртінші сөз“).

“Тегінде ойлаймын: бұ да жақсы, өлер кезде әттеген-ай, сондай-сондай қызықтарым қалды-ау деп қайғылы болмай, алдыңғы тілеу болмаса, артқа алаң болмай өлуге“. (“Тоғызынышы сөз“).

“Пәннеде бір іс бар жалығу деген“. (“Жиырмасынышы сөз“).

“Көзді, мұрынды ауызға жақын жаратыпты, ішіп-жеген асымыздың тазалығын көріп, иісін біліп ішіп-жесін деп“. (“Жиырма жетінші сөз“).

“Жүрттың бәрі біледі өлетүғынын, және өлім үнемі қартайтып келмейтүғынын, бір алғанды қайта жібермейтүғынын“. (“Отыз төртінші сөз“).

“Адамның адамшылығы істі бастағанынан білінеді, қалайша бітіргенінен емес“. (“Отыз жетінші сөз“).

“Енді бұл сөзден білінді, ұят өзі иманның бір мүшесі екен. Олай болғанда, білмек керек, ұят өзі қандай нәрсе?“ (“Отыз алтынышы сөз“).

“Біз жанымыздан ғылым шығара алмаймыз, жаралып, жасалып қойған нәрселерді сезбекпіз, көзбен көріп, ақылмен біліп“. (“Қырық бесінші сөз“).

“Дала уәляятының газетінде“ жарияланған хикая мен Абай прозасының стильдік бірлігіне ондаған, жүздеген мысал келтіруге болар еді. Ал ой туыстығына келсек, жалғас, үндес толғам, түйіндер де біршама. Хикаяда қазақ халқының өткен күндердегі тұрмыс-жайы, мінез-құлқы, заманның жаңаруына сай өзгерістер жайында кейде туралап, кейде тұспалдан біраз айтылған. Сонымен қатар, автор сөз ұшығын кейінге қалдырады.

Хикаядағы осы мәнзілдес түйіндердің біразын Абайдың “Ғақлияларынан“ ұшыратамыз. Эрине, хикаяның тікелей жалғасы емес, бірақ өзегі бір, ойы ортақ, әр кезде жазылған қарайлас, қабаттас, ұстеме байламдар. Бұл арада қазақтың еркін замандағы әдет-ғұрпы мен кейінгі кезендердегі мінезд-құлқы салғастырыла байыпталған “Отыз тоғызыншы сөзге“, халықтың тіршілік кебі туралы кеңес қозғайтын Үшінші, Сегізінші, Он бірінші, Жиырма алтыншы, Отызыншы, Қырық екінші “Сөздерге“ сілтеме жасауға болады. (Көне заман суреті, қазақтың өткендегі игі мінезд, абзал қасиеттері, рухының биіктігі, ән-күйінің әсемдігі, кейінгі ұрпак дәстүрлі салт, ұлттық мінездерден айрыла бастағаны туралы толғамдар Абай поэзиясында да молынан кездеседі).

Бажайлай тексерсек, үйлестік, ұқсастық қана емес, нақпа-нақ қайталау фактілері де ұшырасады екен.

“Дала уәләятының газетінде“ басылған хикаяда Шыңғыстау өнірінің ескі тарихы туралы мынадай деректер келтіріліпті:

“Бұрын өткен атақты Темучин хан Көр ханды қаратып жолы болып келе жатып, Шыңғыстауга жақын бір жерге тоқтады дейді... Қазақтар сол Темучин ханға бағынған он екінші халық екен, бұл жақта қарамаған ешкім қалмайды. Сонда Темучиннің көңіліне: “Бүтін дүниені аласың, Шыңғыс хан деп аталасың“, – деген пайғамбардың сөзі түсіп, өзіне жаңадан ат қоюға ойлапты. Сонда ханға қараған он екі халықтан бір-бір жақсы кісі шығып, Хан тауының басына бір-бір қада орнатып, соған ақ шатыр құрды дейді. Сол он екі кісінің бірі – Майқы еді. Темучинді ақ кигізге көтеріп, таудың басындағы шатырга алыш келді дейді... Осыдан соң сол хан көтерген жер Хан тауы атанып, маңайындағы ауылдар Шыңғыс атанды дейді...“

Енді Абайдың өз атында тұрған, барлық жинақтарына еніп жүрген “Біраз сөз қазақтың қайдан шыққаны туралы“ жазбасына үңілейік:

“Қашан манғұлдан Шыңғыс хан шыққанда, қазақтар құтты босынга барыпты. Бірақ қай жерде барғаны мағлұм емес, сөйтсе де осы Шыңғыс тауында, әскер Қарауыл өзенінің бойында жатып, он екі рудан он екі кісі манғұлдың өз заны бойынша “Хан“ деген үлкен биіктің басында, ақ кигізге Шыңғысты отырғызып, хан көтерген дейді. Тауының Шыңғыс аталағып, биігі Хан аталақ себебі де сол болса керек. Сол он екі кісінің бірі – қазактан Майқы би деген кісі екен... Әуелде Көр ханды өлтіріп ұйғыр жұртын алышты...“

Бұл арада артық түсініктің қажеті болmas.

“Дала уәләятының газетінде“ басылған хикая: Біз де шалдардың айтқанын қостайық: қазақ ішінде бәрі де өзгеріп кетті – мінездері де, жерсуы да. Жақсы болды ма, жаман болды ма – ендігі жазғанымыздан көрінер“, – деген сөздермен тәмамдалады.

Ұлы ойшыл бұл тараптағы толғамдарын баспасөзге жібере қойды деген пікірден аулақпыз. Абай және сол замандағы баспасөз – бізде әлі тексерілмеген мәселе. Кітап шығару қазақ арасында қалыптасқан іске айналған кезде, ниет еткен екінің бірі өлеңдерін бастырып, ежелгі аныз, жырлар ел арасына мындаған данамен таралып жатқан кезде ұлы

ақынымыздың баспа ісінен шеттеп қалуы – мән-мағынасы мол, терен сырлы, әрі арнайы сөз етуге тұрарлық мәселе. Бұл арада аталмыш хикаядан соңғы, қазақ арасындағы өзгерістер туралы жазбаның жарияға шықпай, тіпті, межелі мұратына жетпей токтауы туралы ғана айтпакпыш. Оған да себеп көп. Ең бастысы – ұлы ақынның жаңа заманға өзгеше көзқарасы. Біз бұл мәселенің де бір ғана жағын алыш, онда да тым жайдақтап түсіндіріп жүрміз. Абайдың өкімет тарапынан қатаң бақылау астында болғанын, еш жерде кітап шығармай-ақ, ұн демес цензурадан ғұмыр бойы жапа шеккенін ескермейміз. Абайдың барлық қолжазба мұрасы патша охранкасының ақын аулындағы 1903 жылғы ойраны кезінде қаттауға түскені құмәнсіз. Дәл осы оқиғаның Абай өмірін қысқартқаны, оның құрт шөгіп, тез қартайып, ажалынан бұрын өлуіне себеп болғаны тағы анық. Тәуба, көптеген көшірмелер қалды, бірақ ұлы ақынның өз қолымен таңбаланған түпнұсқа диуанда тағы нелер болғанын кім біледі? Ол – тұманға батқан іс, одан соңғы заманда қашшама апат келді – сақталды ма, сақталса кім қайдан ізdemek – әйттеуір ұмітімізді үзбейік. Қолда бардың өзі өлшеусіз қазына. Абай қазіргі қалпының өзінде толық. Көлемі көбейгеннен бағасы өзгермейді. Әйткенмен біз осы мақала арқылы ұшан дарияның шетке шашыраған бір тамшысы өз арнасына қайтып оралса дедік.

Осы орайда, реті келген соң айта кетейік, “Дала уәлаятының газетінде“ 1895 жылы басылған, Абайға қатысы болуы мүмкін тағы бір әңгіме – “Тәкаппар әскер басы турасынан“ – ұлы ақынға тиесілі мұра емес деген пікіріге тоқтадық. Рас, бұл әңгіменің түп тамыры Абай “Ескендіріне“ барып тіреледі. Бірақ сол поэманды естіген екінші бір адамның қолынан шыққан олақ мазмұндау демекпіз. Әңгімеде Абайға тән, керек десеніз, атақты поэманды сөзбе-сөз қайталайтын оралымдар, тіркестер ұшырасқанымен, жазу мәдениеті жетілмеген қалам таңбасы айқын көрініп тұр. Бұл, тіпті, Абай қолынан шыққан әңгіменің бүлдірілген редакциясы да емес. Поэмамен үстірт таныстық нәтижесінде туған әдепкі әпсана. Мұндай жанғырықтың тағы бір көрінісі – Еңлік – Кебек трагедиясын екінші қайтара, бас кейіпкерлерінің есімдерін өзгертип, өте олақ баяндаған, сол “Дала уәлаятының газетінде“ жарық көрген “Қазақ турасынан хикая“. Аталмыш екі нұсқа да Абай шығармаларының әр түрлі жолмен ел арасына таралып, халық санасына әсер етуінің өзіндік куәлары болып табылады.

Сөз соңында 1892 жылы “Дала уәлаятының газетінде“ басылған “Қазақтардың естерінен кетпей жүрген бір сөз“ атты хикая ешқандай даусыз, Абайға ғана тиесілі шығарма екенін қайталап айтқымыз келеді. Сонымен қатар, бұл – жабайы ақпар, қарадүрсін мақала емес, бас-аяғы бүтін, артық-ауыс мүшесі жоқ, машықты, шебер прозашының қолынан шыққан, ұлы Абай атына лайық туынды екеніне куәлік береміз. Хикаяның көркемдік ерекшеліктері, бейнелеу тәсілдері, стилистикалық сипаты – бүкіл болмыс-бітімі туралы тұтас бір зерттеу жазып шығуға болар еді.

Ендігі кезектегі мәселе – хикаяны текстологиялық түрғыдан қайта қарап шығу. Әңгіменің “Дала уәлаятының газеті“ атты жинақтағы соңғы басылымы мүлде қанағаттанғысыз дәрежеде. Абай прозасының өзгеше күрылымын байыптағандықтан, сөйлем мен сөйлем араласып кеткен, сөз жүйесі бұзылып, мазмұнға нұқсан келген. Жаңсақ оқылған, қате басылған сөздер де көп. Бұл ретте “Жұлдыздары“ басылымға жүгінуге болар еді. Бірақ мұнда да әріп қателері, түсіп қалған сөздер ұшырасады. Керек десеніз, түпнұсқа есепті, газеттегі басылымда да әдепкі емле, тыныс және басқа сыпаттағы қателермен қатар, редактор қаламының ұшы тиген, яғни көпе-көрнеу бүлінген тұстар байқалады. “Көш жүре түзеледі“ дегенмен жүз жыл өтіпті. Қалған шаруаны екінші жүз жылдыққа жіберуге болmas.

Ең бастысы, – Абай қолынан шыққан, әдебиет тарихы үшін, рухани-мәдени қазынамыз үшін айрықша мәнді туындының көлеңкеде қалмауы. Ендігі жерде ұлы ақынның жинағы жаңа әңгімемен толыққаны ләзім.

1989.